

那文毅公奏議

那文毅公籌畫回疆善後事宜奏議卷七十九目錄

卷七十九

剪除餘逆

改撥遣犯給官員役使

安置投回兵丁遣犯

設策擒取逆裔

附鎮制浩罕

恭謝

天恩

那文毅公籌畫回疆善後事宜奏議卷七十九

男  
容安恭唄

剪除餘逆

道光八年四月十九日

奏爲拏獲從逆逆犯訊明分別辦理事竊

臣

於四月

十四日由烏什馳赴葉爾羌准該城辦事大臣恒

敬等咨呈上年派令六品藍翎回子庫爾班金頂

回子愛散木頂毛拉依布拉依木依博拉依木出

卡搜捕餘匪茲據回稱在於前藏推依博特地方

訪有浩罕回子逃竄到彼已被該頭目敦諾普納

莫札爾截拏圈禁當據指交阿布都薩塔爾等二十四名令庫爾班等管解并添派小頭目薩莫等協解進卡訊據阿布都薩塔爾供係浩罕回子頭目前年浩罕伯克著我帶小頭目五十餘人到喀什噶爾攻城後來和闐回子把雅霍普拏到大營張格爾差頭目又到和闐攻城我也跟去的去年三月聽見大兵到了我就同邁瑪玉素普胡里拜約勒奇阿玉普邁瑪底雅爾吐爾素邁瑪特哈里克一起八人逃到前藏去的訊據愛仔洽勒克供我是浩罕管二百多人頭目前年浩罕王子到喀

什噶爾我跟了去張格爾派我跟著賊目去搶十三臺搶完了臺在毛喇巴什住著後來張格爾又派我隨木薩托呼塔到和闐去搶城去年大兵到了葉爾羌我就逃出卡外那阿瓦斯阿布都哈列克都是我們安集延的人訊據克勒木胡里供我是浩罕莊子上阿渾前年隨王子進來跟著張格爾住了幾箇月後來差我送瑪哈莫特伯克到和闐去我就在和闐住下了後來大兵到了葉爾羌他們衆人都逃了我就一同到了藏裡被王子拏住的訊據邁瑪玉素普胡里拜約勒奇阿玉普邁

瑪底雅爾吐爾素邁瑪特哈里克阿瓦斯阿布都  
哈列克供均係浩罕小回子隨同攻城搶臺各供  
如一又訊據瑪勒布巴依烏舒爾阿孜阿瓦斯邁  
里拜邁瑪底巴依愛呢襟爾愛孜木拉特哈達爾  
阿布都哈里克阿玉普阿渾玉散愛散供係布噶  
爾及邁爾噶郎等處回子向在喀葉和三城貿易  
營生或趕脚度日被賊匪脅從聞大兵進剿他們  
逃跑出卡一同跟去並未隨同攻城搶臺反覆究  
詰矢口不移請就近提訊核辦到臣當卽督同委  
員逐犯研訊據阿布都薩塔爾等十二名供悉從

逆攻城搶臺不諱於審明後卽行正法其瑪勒布  
巴依等十二名被賊脅從訊無跟隨賊目前赴各  
城滋擾重情應發伊犁之錫伯索倫額魯特察哈  
爾等營給官兵爲奴前藏推依博特頭目敦諾普  
納莫札爾於回疆從逆人犯竄匿在境協拏護解  
實屬恭順臣傳見小頭目薩莫優加賞賚以示獎  
勵並令傳諭大頭目如再有餘匪逃往卽行截拏  
一面遣人知會毋任遠颺將來

大皇帝必有恩典等語慰勞遣歸護送出卡仍選派能  
事伯克出卡細密訪查如有似此餘逆嚴拏務獲

謹

奏

道光八年五月十五日軍機大臣字寄奉

上諭那彥成奏據恒敬等於上年派令回子庫爾班等  
出卡搜捕餘匪訪有浩罕回子逃竄前藏推依博特  
地方已被該頭目敦諾普納木札爾截拏圍禁當據  
將逃匪阿布都薩塔爾等二十四名交庫爾班等管  
解並添派小頭目薩莫等協解進卡訊明分別辦理  
等語在逃零匪阿布都薩塔爾等或從逆攻搶或被  
賊脅從既據那彥成逐犯研訊屬實自應分別正法



發遣惟所奏前藏推依博特地方是否卽藏內所轄處所抑另係部落名目其頭目敦諾普納木札爾是否番子抑係回子摺內亦未聲明該頭目於回疆從逆人犯竄匿在境協拏護解甚屬恭順該督祇將差來小頭目薩莫優加賞賚其頭目敦諾普納木札爾亦須加以賞賚如該頭目再有遣人効順之處卽著從優獎賞以勵其餘

道光八年八月二十二日會同叅贊大臣固原提督楊公芳喀什噶爾叅贊大臣武公隆阿

奏臣 那彥成前奏葉爾羌回子庫爾班等出卡搜捕

餘匪經前藏推依博特頭目敦諾普納木札爾截  
拏從逆犯阿布都薩塔爾等二十四名添派小  
頭目薩莫等協解進卡訊辦欽奉

諭旨前藏推依博特地方是否卽藏內所轄處所抑另  
係部落名目其頭目敦諾普納木札爾是否番子抑  
係回子摺內亦未聲明該頭目於回疆從逆人犯竄  
匿在境協拏護解甚屬恭順該督祇將差來之小頭  
目薩莫優加賞賚其頭目敦諾普納木札爾亦須加  
以賞賚如該頭目再有遣人効順之處卽著從優獎  
賞以勵其餘欽此查推依博特在葉爾羌之南相距

四十五日路程東南距西藏交界之岔巴禪潭半  
月路程西南距克什米爾十二日路程該處居人  
稱其頭目爲熱竭自爲一種部落不屬西藏亦不  
隸他處管轄俗尙佛教耕種爲業蓄髮留辮衣穿  
圓領言語衣服均與回子不同係屬番子前奏漏  
未聲敘且該頭目協拏回疆從逆餘犯甚爲恭順  
未經賞賚亦屬疎忽

臣

現已咨行葉爾羌如該頭

目再有遣人効順之處從優給賞以示

聖主獎勵有功加惠夷服之至意謹

奏奉

硃批已有旨諭知惠顯等

道光九年二月初五日會同喀什噶爾叅贊大臣  
武公隆阿葉爾羌辦事大臣札公隆阿

奏爲推依博特夷人續獲從逆逸犯協解進卡訊明  
分別辦理事竊照葉爾羌六品頂翎回子庫爾班  
等上年在推依博特地方協拏從逆逸犯阿布都  
薩塔爾等經臣那彥成訊擬奏

聞聲明仍派能事伯克出卡訪查餘孽務獲並傳諭推  
依博特頭目如再有餘匪逃往卽行截拏在案茲  
據庫爾班協同推依博特夷使素爾莽素續獲從

逆逸匪及被脅逃往回子卽魯克等十名押解來  
葉臣札隆阿親提研訊據卽魯克多斯薩比爾同  
供我們都是喀什噶爾回子從前與烏舒爾合夥  
做買賣因烏舒爾同張格爾造反叫我們隨他我  
們就跟著破了喀什噶爾滿城殺過官兵又到葉  
爾羌搶了兵民什物破了和闐城住了八箇月聽  
得大兵來到一同逃至推依博特去的訊據沙米  
爾稟供我是巴達克山回子在葉爾羌生長的道  
光六年被賊目邁買提裹脅同往攻破和闐城搶  
過官兵什物訊據庫爾班供係葉爾羌朶蘭回子

推米爾供係阿克蘇回子柔則供係和闐回子又據同供我們都在和闐作小買賣賊匪破城之時被脅替他們拉馱子後來一同逃往推依博特又訊據牙和普米爾祿巴依巴拉特同供我們都是布噶爾回子向在喀什噶爾和闐等處貿易張格爾滋事的時候銀錢貨物都被搶了那時逃往推依博特去的人多我們也去避難並沒隨同攻城打仗給賊役使情事反覆詰訊案無遁飾錄供咨請核辦前來

臣

等會查得推依博特協拏逸犯十

名內邱魯克多斯薩比爾沙米爾祿四犯均已供

認隨賊攻城戕害官兵擄掠兵民什物情節較重  
應卽予正法以彰

國憲其庫爾班推米爾柔則等三名被賊裹脅牽拉  
駝馱並無抗拒官兵重情應發伊犁之錫伯索倫  
等營給官兵爲奴牙和普米爾襍巴依巴拉特等  
三名均係布噶爾回子在卡內貿易當賊匪搶掠  
之時逃出卡倫並未被脅入夥自應給票出卡遣  
回本處以昭平允至推依博特頭目上次截拏逸  
犯派人協解進卡欽奉

諭旨該頭目於回疆從逆人犯竄匿在境協拏護解甚

屬恭順該督祇將差來之小頭目優加賞賚其頭目  
敦諾普納木札爾亦須加以賞賚該頭目如再有遣  
人効順之處卽著從優獎賞以勵其餘欽此茲該頭  
目又復截擊餘匪十名經庫爾班等到彼卽行指  
交並派小頭目素爾莽素協同護解前來其恭順  
實在至誠自應欽遵

諭旨從優獎賞並據該夷使面稟探聞

臣

那彥成尙駐

喀城欲求謁見

臣

札隆阿卽派令叅將長恒等護

送至喀什噶爾

臣

那彥成傳見加之慰勞賞給該

頭目敦諾普納木札爾大緞四疋江綢四套元寶



四錠附茶四封交令賫回並賞該夷使素爾莽素  
大緞二卷江綢二套元寶二錠附茶二封該夷使  
伏地叩頭感激之誠形於辭色因該夷使順帶貨  
物前來貿易當令長恒等卽日護送回葉貿易事  
畢臣札隆阿查照奏定章程令原派將備伯克等  
押送出卡以符定制謹

奏

道光九年三月初六日奉

上諭那彥成等奏推依博特夷使續拏逸犯協解進卡  
一摺葉爾羌六品頂翎回子庫爾班在推依博特地

方協同該夷使素爾莽素續獲從逆逸匪及被脅逃出各犯訊明辦理其前經隨賊攻城戕害官兵之耶魯克多斯薩比爾沙米爾禰四犯均著卽行正法其庫爾班推米爾柔則三犯俱係被脅同行並無抗拒官兵情事著發往伊犁錫伯索倫等營給官兵爲奴牙和普米爾禰巴依巴拉特三名均係布噶爾回子前在卡內貿易因賊匪搶掠逃出卡倫並未被脅入夥著給票遣令出卡卽回本處餘著照所議辦理

道光八年八月初三日會同叅贊大臣固原提督楊公芳喀什噶爾叅贊大臣武公隆阿

奏爲續拏從逆餘匪訊明分別辦理事竊查前年張  
逆入卡滋事各城回子或甘心從逆或被脅入夥  
人數衆多迨大兵臨蒞畏懼斃洗紛紛逃出卡倫  
其家屬尙在各城居住現有潛回本莊者經伊薩  
克先後拏獲喀什噶爾回子米奴魯斯等二十二  
犯呈請訊辦前來臣等當卽督同委員逐一研訊  
據米奴魯斯並伊子胡答拜第及牙伙普阿布都  
拉普托胡答五犯同供均得受張格爾僞職隨同  
攻城打仗殺害官兵回子打死阿奇木邁瑪薩依  
特屬實據多列特依斯拉木愛里海連達沙四犯

同供均隨同攻城打仗堵擋官兵供認不諱以上  
九犯情節較重臣等於訊明後卽行正法又訊據  
堪迪爾毛列克愛依特呢雅斯米滿哈迪爾阿布  
都拉托胡達托胡達素皮呢雅斯爾雅斯十一犯  
同供均係被脅從逆並未攻城打仗情有可原應  
發伊犁給錫伯索倫額魯特察哈爾等營官兵爲  
奴其餘邁哈素提並伊子阿烘二名訊係不肯從  
逆逃出卡倫事後回歸並無被脅情事卽行省釋  
又准葉爾羌解到各軍臺從逆朶蘭回子庫圖魯  
克等二十三犯訊悉庫圖魯克庫爾班推連底依

布拉依木烏舒麥特霍卓拉克邁瑪素皮七犯均  
充各臺溫巴什玉孜巴什愛則普汰劣普二犯均  
係臺上當差回子又據同供跟大頭目薩達特殺  
斃七臺至十三臺弁兵沿途搶臺至阿克蘇都齊  
特臺一帶打仗屬實以上九犯情節較重卽行正  
法將首級解赴葉爾羌各軍臺梟示又訊據阿瓦  
斯米曼阿爾組霍卓拉克汰劣普庫爾班奈吉麥  
特伯爾曼胡里愛孜木愛什瑪特呢雅素皮托土  
孫麥特阿伯爾十三犯同供均被薩達特派令傳  
人遞信並未隨同搶臺情有可原應發伊犁錫伯

等營給官兵爲奴邁瑪提一犯訊係賊目薩達特之子現年十二歲應照緣坐改發給伊犁烏魯木齊等處駐防及各城出力伯克爲奴兩案人犯均於七月二十三日行刑訖發遣各犯另行造冊咨部惟查各城被脅從逆回子竄匿者甚衆該犯等羣聚外夷日久亦滋流弊茲<sub>臣</sub>等仰體

皇上法外仁恩請援照自首免罪之例於各卡倫出示曉諭予限三箇月准其入卡投首概免死罪倘逾限不回將來緝獲到案仍從重治罪此時各城回子業已深知威畏又復網開三面俾竄匿罪人咸

以生還爲幸不致羣聚外夷日久爲患謹

奏奉

硃批所辦是著依議行

道光八年八月初三日會同叅贊大臣固原提督

楊公芳喀什噶爾叅贊大臣武公隆阿

奏查長齡具奏緣坐人犯請照給功臣爲奴不能養

贍之例分別改發欽奉

諭旨准其分給伊犁烏魯木齊等處駐防並分賞各城  
出力伯克爲奴緣坐男犯同被脅入夥之犯著一併  
發給伊犁錫伯索倫額魯特察哈爾爲奴惟該遣犯

等人數較多著該管大臣零星安置嚴加約束毋令  
聚集一處致生事端欽此茲查緣坐十六歲以上男  
犯並被脅情有可原逆犯共四百零九名應發錫  
伯等營給官兵爲奴其餘緣坐婦女幼孩共一千  
二百四十七名應發駐防及出力伯克爲奴惟此  
等逆回種類多至一千六百餘名口若散在南北  
兩路雖非聚集一處而聲氣相通不能不防其流  
弊臣等現擬於男犯內分賞在事出力文武伯克  
等照賞給功臣爲奴本例辦理遵

旨零星安置易於約束其餘婦女幼孩仍發給伊犁烏



魯木齊等處駐防及各城出力伯克爲奴並分晰  
造冊咨解謹

奏奉

硃批依議

道光八年十一月二十二日會同喀什噶爾叅贊  
大臣武公隆阿

奏爲訊辦被脅從逆及娶有回婦之漢回分別定擬  
事竊照漢回盤踞各城誑騙回子財物教誘犯法  
久爲回疆之害前年張格爾入卡滋事回子膽敢  
助逆固由於平日安集延之勾結亦由於漢回之

煽惑甘肅一省漢回十居其三其無執業者率皆遊手出關一到回疆先學回語藉同教爲名男女不避任意姦淫盤剝誑騙無所不至久之則娶回婦爲妻益加親近張逆滋事以前竟有漢回離去髮辮充當阿渾之事是其教誘犯法引惹邊衅必當照漢奸流棍懲辦節經臣等咨行各城確查不法漢回據實嚴辦去後旋准葉爾羌辦事大臣札隆阿派人嚴細查訪拏獲被脅漢回馬伏趙永伏及娶有回婦漢回馬得隆馬建林等咨解前來臣等督同委員逐一研訊據馬伏供嘉慶八年來到

葉爾羌作小買賣二十五年娶過回婦哈比爲妻  
道光六年五月到英吉沙爾覓食六月內張格爾  
滋事叫我守城城破賊擄去割了辮子見了素皮  
察克分給阿布都依伯克爲奴九月裏給賊目博  
巴克喂馬至上年二月大兵到時博巴克逃跑沒  
有跟去自行投出迎接官兵仍在葉爾羌作買賣  
據趙永伏供道光二年五月到吐魯番傭工三年  
八月來到葉爾羌開飯舖六年三月到喀什噶爾  
討賬六月內張格爾滋事叫我買賣人守城城破被  
安集延拏去割了辮子見了張格爾將我分給活

則孜做飯大兵到時我自行投出隨官兵回到葉爾羌傭工度日又訊據馬得隆供道光四年趕車到葉爾羌謀食娶回婦愛比拜爲妻五年到烏魯木齊去覓食七年隨大兵拉駱駝回至葉爾羌馬建林供道光三年出關在吐魯番一帶謀生七年隨大兵到葉爾羌娶回婦愛密岱爲妻各等供臣等查馬伏趙永伏均係薙過髮辮甫經蓄留該二犯盤踞回疆歷有年所難保無薙髮從夷情事據供被賊擄去割去辮子均係恃無質証事後諉飾且旣已被脅入夥爲賊役使供認不諱應比照被

脅入夥自行投首發回疆給官兵爲奴例改發雲  
貴兩廣極邊烟瘴充軍馬德隆馬建林二犯均未  
被擄從賊惟例無擅娶回婦明文若僅予枷杖遞  
籍則旋去旋來於懲戒依然無裨當此辦理善後  
立法伊始之時若不從嚴問擬日久合一大有關  
係臣等悉心酌擬此等擅娶回婦之犯甘心依附  
夷族娶妻育子已無父母妻子之念治以流諸遠  
方終身不得還鄉之罪亦不爲過應請將馬德隆  
馬建林二犯擬以杖一百流二千里各該犯所娶  
回婦照例離異惟各城漢回雜髮及擅娶回婦向

爲例禁所未及非從嚴究辦漢回盤踞回疆之積習日久必滋流弊相應請

旨飭下部臣將薙髮從夷及擅娶回婦二條分別定罪其薙髮而又娶回婦者應作何治罪之處一併明定科條奏准通行以便遵照援引謹

奏奉

硃批所辦甚屬周妥另有旨諭

道光八年十二月二十八日奉

上諭那彥成等奏訊辦被脅從逆及娶有回婦之漢回分別定擬一摺所辦甚屬周妥葉爾羌地方拏獲從

前被脅從逆之漢回馬伏趙永伏二犯著照所擬發  
往雲貴兩廣極邊烟瘴充軍其擅娶回婦之馬得隆  
馬建林二犯亦著照所擬杖一百流二千里漢回盤  
踞各城並有雜髮從夷之事及擅娶回婦者作何治  
罪之處例無明文著刑部分別定罪並將雜髮而又  
娶回婦者一併明定科條奏准通行遵照辦理

收撥遣犯給官員役使

道光八年八月二十二日會同叅贊大臣固原提督楊公芳喀什噶爾叅贊大臣武公隆阿

奏爲改發回疆人犯給予章京衙門服役並駐防人員准其挈眷事伏查定例姦盜爲從及邪教等犯均發回城給伯克回子爲奴歷經遵辦在案惟漸積漸多而內地犯事之人率多強橫回子性懦不能管束反受欺累且增養贍之費殊非所願臣等因各城印房等處章京筆帖式役使回子苦刻婪索於裁革陋規摺內奏明永遠裁革但查章京等



均係寒苦旗員不能多帶家丁無人役使亦覺缺於體卹今擬將發給回城爲奴之犯酌撥印房各章京筆帖式等供役在該員等役使有人而遣犯有官員管束亦爲較嚴回子等亦少一苦累如有不遵管教再有強悍犯法之事回明本城大臣加重辦理卸任之時列入交代不准攜回本城挨撥給各章京衙門足數役使再分給大小伯克爲奴由各城大臣酌量分撥報部查核冊冊分給小吏子以免擾累於本例既無更易而安置較爲兩便如蒙

俞允請

旨飭下部

臣

核入條例通行各直省及回疆各城大臣

一律遵照辦理再查舊制回疆各城大小官員均  
不准挈眷而伊犁烏魯木齊等處駐防旗人由馬  
甲挑補筆帖式海陞主事離家二十餘年之久年  
力正壯之人孤身久住以致姦宿回婦罔顧廉恥  
等事勢所難免茲各城大臣現已欽奉

諭旨准其挈眷該駐防章京筆帖式等擬請准其一體  
挈眷惟向來伊犁烏魯木齊各章京筆帖式往往  
有挈親友來至防所日久藉勢滋擾無弊不作大

似內地州縣官親於例亦當查禁此後雖准挈眷  
亦只准帶本身子孫隨任此外親族人等一概不  
准挈帶違者照例嚴辦并將家口人數報由本旗  
呈請將軍都統咨照各城大臣查明各部備案以  
示限制謹

奏

道光八年九月二十二日奉

上諭那彥成等奏回疆遣犯請給章京衙門服役並駐  
防人員請挈眷赴任一摺向來發遣回城人犯例給  
伯克回子爲奴近因漸積漸多回子難於管束且各

城印房等處章京筆帖式役使乏人著照所請嗣後發給回城爲奴之犯准其酌量撥給印房各章京筆帖式等供役該章京等卸任之時列入交代不准挈回本旗俟撥給各章京衙門足數役使再分給大小伯克爲奴毋庸分給小回子以免擾累著該部載入條例通行各直省及回疆各城大臣一律遵照辦理至回疆大小官員向例不准挈眷茲議定章程各城大臣已降旨准其挈眷該駐防章京筆帖式等事同一律亦著照所請嗣後各城駐防官員均准其挈眷赴任祇准帶本身子孫其親族人等一概不准帶往

以示限制該部知道

安置投回兵丁遣犯

道光八年十一月二十二日會同喀什噶爾叅贊大臣武公隆阿

奏查喀什噶爾舊案內遣犯二百餘名經原任叅贊大臣慶祥派令守城打仗非臨陣遇害卽被賊擄去上年四月間由葉爾羌色勒庫爾投回遣犯羅賜長郭岐山二名訊據同供該遣犯派充鄉勇守城城破後被賊擄去押赴巴達克山途次色勒庫爾經該處伯克邁瑪特沙奪留聞大兵到來方敢投回等語當交臺市營員妥爲安插查此次勦辦

逆回阿克蘇烏什兩城遣犯隨同堵禦効力均先  
後奏奉

恩旨准其免罪釋回交地方官嚴加管束欽此欽遵在  
案茲遣犯羅賜長郭岐山均係充當鄉勇堵禦効  
力失守被擄旋即投回尙知嚮義且遣犯二百餘  
名投回者僅止數人亦堪憫惻相應援案奏懇  
聖恩俯准羅賜長郭岐山二犯免罪釋回遞解原籍交  
地方官嚴行管束以廣

皇仁謹

奏

道光八年十二月二十八日奉

上諭那彥成等奏投回遣犯會隨同堵禦効力懇恩免  
罪釋回等語遣犯羅賜長郭岐山均著准其免罪釋  
回交原籍地方官嚴行管束

道光九年正月十二日會同喀什噶爾叅贊大臣  
武公隆阿

奏查此次浩罕送出兵丁遣犯業經

臣

等奏懇

恩施分別釋回在案茲有投回伊犁錫伯營兵丁達春  
泰西林泰遣犯楊懋修由守卡弁兵押送前來訊  
據供稱我們被擄送至浩罕本年八月間與德克



金布等商議投回一同跑至倭什地方經該處伯克毛洛阿奇木令布魯特巴哈提拜帶出我們行走不遠旋即患病今病痊投回等語詰訊起意投回情節與德克金布等供均相脗合相應奏明請旨將達春泰西林泰釋回原營免其治罪不准復挑差使楊懋修釋回原籍交地方官嚴加管束與前奏兵丁造犯畫一辦理謹

奏

道光九年二月十四日奉

上諭那彥成等奏請將被擄投回之兵丁造犯分別釋

回等語伊犁錫伯營兵丁連春泰西林泰俱著釋回  
原營免其治罪不准復挑差使遣犯楊懋修著釋回  
原籍交地方官嚴加管束

設策擒取逆裔

附鎮制法罕

恭謝

天恩

道光八年五月初六日會同叅贊大臣固原提督  
楊公芳喀什噶爾叅贊大臣武公隆阿幫辦大臣  
蘇公清阿

奏爲欽奉

諭旨恭摺覆奏事竊

臣

於四月二十一日行抵喀什噶

爾承准軍機大臣字寄道光八年三月二十五日

奉

上諭據長齡等奏查明卡外各夷震懾安靜情形並從  
逆伯克博巴克等下落分飭各夷嚴密查拏復遵諭

旨譯寫簡明回子檄諭飭知浩罕布噶爾拏送逆裔家屬等語此次入卡肆逆原係張格爾首先倡亂現已法網難逃生俘闕下明正刑誅該逆裔家屬潛匿外夷苟全生命原無足重輕如果該部落遵檄解送盡絕根株固屬甚善倘竟視爲奇貨斷不值與之相較前降諭旨甚明該將軍等又傳檄前往那彥成到彼看其若何稟覆如該夷等尙存觀望但當嚴守卡倫不准通商貿易一面將卡內善後事宜布置周妥總令各回衆畏威懷德不復思亂自當絕其煽誘永靖邊陲切勿勞師遠出嚴索窮搜方爲得體至博巴

克等甘心從逆固屬罪不容誅然視逆裔家屬更無  
關輕重總責令布魯特等嚴拏縛送盡法懲治亦不  
必派兵出卡查拏也再發去御製詩清漢文各一張  
那彥成等卽遵前旨於喀爾鐵蓋山勒石建碑將此  
由五百里諭知那彥成楊芳並諭武隆阿蘇清阿知  
之欽此

臣

等跪讀之下仰見我

皇上神謨操縱握算萬全不勝欽敬欽服伏查長齡檄  
諭浩罕布噶爾拏逆裔家屬尙未據稟覆惟浩罕  
於未奉檄諭之先遣人投書據守卡官兵呈報

臣

等先令伊薩克詢其來意並索出來書譯看據稱

張格爾就擒實係天意差人來與將軍大人們道  
喜其餘被擄去之兵丁商民亦可送出惟回子經  
上從無送和卓之例來書語言雖無悖謬惟全函  
均係墨字該伯克之名用泥金繕寫殊有妄自尊  
大之意臣等當令伊薩克傳諭該夷使此次張格  
爾滋事其實

天朝只動兵三萬已經所向無敵旬日之間四城全行  
克復且卡內回民深感

大皇帝數十年休養之恩大兵一到處處殺賊歸降而  
出力打仗及捐軀効命者爲數更多即使張格爾

尙在亦何足爲患此時生擒該逆獻俘

闕下其家屬又何關輕重卽令張逆有子將來藉可哄動愚回敢於滋事不過如此次之張格爾而已

天朝亦不過再費三萬兵力一舉剿除

天朝威武從前所滅各國爾等皆知此次生擒張逆又何足道喜爾部落彈丸之地在中國僅一州一縣之大

大皇帝如果與師問罪滅此朝食又費兵力幾何因不值與無能外夷計較是以未申

天討此後不獻其家屬亦無足重輕但不准爾部落進

卡貿易恐爾附近各部落知

天朝斷絕你們貿易從此小視於爾甚與爾愛屢無益  
爾伯克遣爾前來既無別的說話大人們亦不見  
爾爾卽回去一一遵諭傳知臣等於該夷使到卡  
之時先已派撥懂事弁兵嚴密防查不准與流寓  
安集延及本處回子交接亦不准其開包貿易卽  
日撥兵八十名酌給口糧押送卡外並未犒賞蓋  
緣上年各外夷遣使騙賞不一而足浩罕屢遣人  
來詭詞搪塞均邀溫諭重賞以致夜郎自大茲復  
逞其詭詐伎倆前來嘗試查浩罕每借貿易獲利



且可仗與

天朝通市用以恐嚇附近外夷今不予傳見亦無筵宴  
賞賜破其謫詐或可稍知畏懼俟再有稟到據實  
具奏臣等伏思逆裔家屬並從逆逸犯竄匿外夷  
豈容久稽顯戮惟己殲厥渠魁誠如

聖訓無足重輕臣等深受

聖明訓誨之恩少知輕重斷不敢倖功妄動致生邊衅  
惟有恪遵

諭旨嚴守卡倫不准通商貿易料該夷生計窮蹙必當  
縛獻逆裔要犯以爲求通貿易地步奉發

御製詩臣等現已覓石選工於喀爾鐵蓋山建碑鐫泐  
以垂永久謹

奏奉

硃批深得大體與朕意相同可嘉之至另有諭旨

道光八年六月初七日軍機大臣字寄奉

上諭那彥成等奏浩罕遣人投書道喜當經遵旨傳諭  
該夷使卽日撥兵八十名酌給口糧押送卡外不與  
傳見亦無犒賞等語前據長齡等檄諭浩罕布噶爾  
拏送逆裔家屬特降諭旨令那彥成到彼看其若何  
稟復具奏辦理乃浩罕於未奉檄諭之先遣人投書

嘗試殊爲詭詐那彥成等於該夷使到卡時派撥弁  
兵嚴密防查不准與流寓安集延及本處回子交接  
亦不准其開包貿易一面遵旨傳諭並未犒賞卽行  
撥兵送出卡外所辦甚得大體與朕意相同可嘉之  
至浩罕每借通市獲利用以恐嚇附近外夷此時惟  
嚴守卡倫禁絕貿易該大臣等務當遵照前旨妥爲  
辦理其從逆逸犯總責令布魯特等嚴拏縛送不必  
派兵出卡遠索窮搜

道光八年七月十九日

奏爲恭謝

天恩事七月初七日接奉

上諭那彥成等奏浩罕遣人投書所辦甚好與朕意相  
同可嘉之至茲發去御筆畫扇一柄扇套一箇香袋  
四箇著交那彥成祇領以昭眷注欽此並准兵部賚  
到

恩賞各件望

闕叩頭祇領竊憶臣祖阿桂前在伊犁將軍任內曾

蒙

高宗純皇帝

恩賞詩扇

聖製云典屬今時班定遠冠軍昔日霍嫖姚雪途無藉持  
清暑欲扇仁風萬里遙又在金川軍營蒙

賜蘭花畫扇

聖題云二人同心其利斷金同心之言其臭如蘭伏念

臣

質同蒲柳材類砒砒

命赴南疆俾籌西事凡規畫有關善後皆

聖明早定機先獻乏芻蕘正深惶悚迺蒙

恩同山嶽

特賜褒嘉當七夕之良辰奉五明之佳筵

筆花璀璨芳芬則慶溢蘭蓀

墨寶琳琅安戢則根深磐石沛

九天之雨露此真王者之香綬重譯於昇平是乃

聖人之域况乎鞏固成基卷舒在握爾賤魚竹貝錦哉

珍象藏龍涎香囊含馥拜

天家之異數六十年之佩德孫祖蒙庥敷

大化之均沾萬餘里之新疆

後

先同揆欽惟

皇上謨猷廣運克纘

前徽竊念

臣

識畧庸愚有慚祖蔭惟當仰體

道心淵靜敢銘敬慎之良規熟籌邊幅機宜遠播奉揚之

休德謹

奏奉

硃批知道了

道光八年十一月二十二日會同喀什噶爾叅贊大臣武公隆阿

奏爲浩罕遣人送信並送出滿漢官兵等五名遣犯四名民人一名伯克一名回子十一名取據各供情  
情形事竊查本年夏間浩罕遣使到卡臣等因該

夷辭氣傲慢並未送出官兵商民等一人未與接見登時驅遣去後各情節業經具奏並蒙

聖明批示在案復探得曾在喀什噶爾貿易之安集延毛洛阿奇木現爲該部落管事之人其家屬田產俱在喀什噶爾伊薩克向與熟識此次欽奉

諭旨驅逐各城居住十年以內之安集延案內毛洛阿奇木卽在遣中毛洛阿奇木出卡時曾向伊薩克云我們安集延在各城貿易安居樂業俱受

大皇帝之恩與現因安集延內多有幫助張格爾造反之人經



欽差大人將我們攆逐出去大人們必當如此辦實在  
是我們自己作孽無可再說如今我回到浩罕必  
定要格外出力巴結以贖前罪再求施恩等語臣  
等以浩罕來人被逐回去該部落必有情形密令  
伊薩克派布魯特巴哈提拜致信與毛洛阿奇木  
藉以偵探浩罕如何光景去後茲於十月二十八  
日巴哈提拜回城帶同毛洛阿奇木差人毛洛密  
孜並帶有該處管事頭目明巴什邁瑪特習里普  
給伊薩克信一封毛洛阿奇木給伊薩克信一封  
送出滿兵德克金布綬亮薩炳圖漢兵沈長發馬

衍貴遣犯郁景順劉士信陳卷王金芳民人郝甲  
明等十名前任喀什噶爾五品海子伯克通事阿  
布都拉及小回子等十一名臣等閱該邁瑪特習  
里普信內不似前次倨肆而詞句仍復不馴而所  
差之人口傳之語暨毛洛阿奇木信內情詞又極  
恭順臣等揣度情形舍之德克金布等所供該浩  
罕伯克邁瑪達哩年甫二十餘歲荒淫無知該處  
一切事務全仗明巴什邁瑪特習里普一人該明  
巴什向以能抗拒

天朝欺蔽該伯克邁瑪達哩外而恐嚇附近各部落以

逞能固寵此次送出官兵遣犯回子等二十二名  
明係邁瑪特習里普希圖通商或可冀

天朝要中原人與張逆之子彼時再講元寶可圖大利  
書信則故作大言與其伯克閱看以爲欺蔽又令  
來人毛洛密攷口傳之言極其恭順作爲哄誘不  
斷之計詢據來人稱係向來書信如此說話纔恭  
順是回子規矩如此尤爲可笑該夷信內有仍欲  
在喀什噶爾貿易由該伯克放胡達依達阿克薩  
哈爾都照先年規矩如果照行卽當將所有中原  
人一併送出並向伊薩克討回信等語查從前雖

有放胡達依達阿克薩哈爾歷任辦理錯誤之事  
此次大兵懲創以後正當將該夷向來倨傲惡習  
一一更正使之凜畏方足以示

天朝法度臣等已飭令伊薩克仍派巴哈提拜前往寄  
信於邁瑪特習里普將其故作大言如鬼如蜮之  
用心一一指出復寄信於毛洛阿奇木獎其恭順  
諭知該夷如果恭順

天朝將兵民回子等一併送出自然可以奏明  
大皇帝仍准通商貿易否則永遠不准通商在

天朝原無所損在爾輩爾浩罕自當生計窘迫因邁瑪

特習里普的信寫得不好並未敢回大人們知道  
恐致大人們生氣那時與你們多有不便等語復  
密與毛洛阿奇木一信諭知該處兵民回子送與  
不送都不要緊你們居奇者不過張格爾之子布  
素魯克自

夫朝看來亦不要緊將來至極不過又一張格爾只要  
一兩萬兵便可平定你們現在通買賣爲第一要  
事却不肯恭順懇求仍作大言此地大人們倘或  
永遠禁止通商於你們大不好我是回子告知你  
們的都是實話此字並不可令明巴什知道等語

當卽差布魯特巴哈提拜持信前往至該處差來  
之毛洛密孜<sub>臣</sub>等因係該處無關緊要之人且據  
邁瑪特習里普來信仍未馴順是以仍未令其謁  
見令伊薩克嚴行收管俱於次日卽派人押解出  
卡訖查浩罕伯克邁瑪達哩年幼無知爲邁瑪特  
習里普所把持該夷來信虛詞怠慢不過欺朦其  
伯克又藉以哄誘各外夷鬼蜮伎倆不過如此惟  
該處以貿易爲生計各該外夷部落向來貿易俱  
假道浩罕浩罕因而抽稅現自閉關以來各外夷  
商賈聚集浩罕夷衆均怨懟浩罕是通貿易爲該

夷必不可緩之事此次差人到城送出兵丁回子等二十二名意在探聽通商邁瑪特習里普之信詞氣不馴而來人口傳之言與毛洛阿奇木之信情詞又極恭順言與信兩歧在該夷以爲臣等如果信毛洛阿奇木之說卽准通商必致哄誘各外夷以邁瑪特習里普來信虛詐所致互相傳說以爲恐嚇是又墮其術中至德克金布等供詞俱稱道光六年八月張格爾破城被擒旋送至浩罕分給該處各伯克家於本年八月間有安集延毛洛密孜向伊等說你們要跑就跑了罷毛洛阿奇木

在倭什等候你們等語伊等衆人商議作兩起跑  
至倭什地方該處伯克毛洛阿奇木令布魯特巴  
哈提拜並安集延毛洛密孜一同送出臣等復委  
員隔別詢問浩罕情形據稱浩罕伯克年幼無知  
全係明巴什一人管事常與烏勒特派打仗今年  
打了敗仗傷了許多人折了許多牛馬該處茶葉  
大黃尙多所需內地綢緞布疋等項昂貴之至去  
年夏秋時候由塔爾巴哈台那邊販來茶葉不少  
今年聽說那裡卡倫甚嚴沒有茶葉貨物來各等  
情滿兵德克金布綏亮薩炳圖漢兵沈長發馬第



貴遣犯郁景順劉士信陳卷王金芳民人郝甲明  
原任伯克阿布都拉及回子十一名僉供無異查  
此項兵丁遣犯回子等二十二名因喀城失守被  
脅送至浩罕實出無可如何與甘心從賊者不同  
相應援照自浩罕投回之卡倫侍衛連城經長齡  
奏明奉

旨免罪釋回之案奏懇

恩施分別免其治罪各旗人釋回出旗不准再挑差使  
民人交籍嚴加管束回子就近安置嚴管內五品  
海子伯克阿布都拉一名係黑帽回子實因不降

張逆是以送往浩罕情節又有不同自應請

旨賞還翎頂仍交伊薩克如果並無他故將來有五品  
伯克之缺仍准錄用謹

奏

道光八年十二月二十八日軍機大臣字寄奉

上諭那彥成等奏浩罕遣人送信并送出前擄官兵遣  
犯回子等意在求通貿易一摺浩罕每藉通商貿易  
漁利外夷又以逆裔家屬在伊部落居爲奇貨此次  
因將安集延驅逐出卡嚴禁茶葉大黃不與通市該  
處管事頭目明巴什邁瑪特習里普聽毛澤陽等本

慈惠遣人送信雖不似前次倨肆而詞語仍復不馴  
那彥成等仍未令其謁見卽派人押送出卡所辦極  
是現自禁絕貿易以來外夷各部落因諸多不便怨  
懟浩罕如果各城認真嚴禁該夷無利可牟日久自  
當窮蹙將來誠心懾服斷不敢大言不慙此時若以  
其意欲修好卽信以爲實必致伊誇耀外夷豈非墮  
其術中該督等旣見及於此必應妥爲籌計務當嚴  
飭各城稽察要隘不准茶葉大黃稍有偷漏在卡外  
恭順各部落自當按照奏定章程通市互易惟不可  
任浩罕夷商有影射冒混情弊致查禁有名無實轉

爲外夷所竊笑現在送出之官兵回子等固是無關  
輕重卽張逆家屬在彼潛匿不過苟全生命亦不值  
與之相較責令必爲獻出該督摺內旣稱張逆之子  
布素魯克至極不過又一張逆一二萬兵便可平定  
是亦有何緊要該督等惟當遵照節次所降諭旨示  
以無足重輕斷不可勒令縛獻如果浩罕因絕其通  
市實形悔懼自將逆裔家屬獻出絕其根株固屬甚  
善若必加之以威而仍居奇如故或竟以假淆真彼  
時又將如何辦理豈不又生枝節耶該督等雖已向  
送回兵丁回子德克金布等詢問浩罕情形惟恐或

有串捏不實不盡著卽於官兵回子等二十二人內  
擇其明白誠實者督同伊薩克隔別訊問務將浩罕  
一切情事及近日情形逐一詳加研鞫據實具奏至  
送回之兵丁遣犯回子等二十二名因被脅送至浩  
罕與甘心從逆者不同著加恩免其治罪德克金布  
等釋回本旗不准再挑差使沈長發等釋回原籍交  
地方官嚴加管束回子等交該伯克就近安置嚴管  
其五品海子伯克阿布都拉係黑帽回子因不降張  
逆從往浩罕情尙可原著加恩賞還翎頂仍交伊薩  
克察看如無他故將來遇有五品伯克缺出仍准錄

用

道光八年十二月初十日會同喀什噶爾叅贊大

臣武公隆阿

奏爲到喀什以後籌辦各逆犯情形恭摺具奏事竊

臣

那彥成於上年冬間渥蒙

恩眷派辦回疆善後事宜自本年四月馳抵喀什噶爾  
以來一切應辦事件悉蒙

皇上指示機先遵循辦理現在卡內善後諸大端業已  
辦有頭緒節次奏蒙

聖鑒在案卡外事惟收撫布魯特及逆裔家屬二事

臣

早經遣人辦理所有各愛曼多有來歸查張逆之子布素魯克現在浩罕該夷從前以張逆爲奇貨此時仰仗

天威生擒張逆而張逆傾陷四城所有擄掠諸物悉歸浩罕是浩罕以張逆爲獵犬內收實利外無助逆之名其狡詐詭譎實爲可惡此時自不應調集兵馬再生邊釁現奉

諭旨不准該夷通商遵照嚴密辦理不懈不煩兵力坐操全勝實爲制邊長策臣等曷勝欽服惟逆裔布素魯克年已六歲與張逆之妻均在浩罕該逆裔

已屬灰燼之餘斷無復燃之理第此時不斷絕根  
株不但回衆繫心數十年後難保不爲邊患臣自  
到喀後悉心設法五月間曾差喀什噶爾生長之  
安集延推勒瑪穆特等二名潛往浩罕作爲貿易  
密諭其能生致固屬盡善否則梟首繳差其功亦  
不爲小奈因孤掌難鳴未能下手又於六月間密  
差喀什噶爾回子烏舒爾同呢雅斯等二名前往  
亦未回信復差安集延回子伊斯罕達爾等許以  
重賞前往刺殺因致漏洩將該安集延欲行殺害  
該處頭目和卓達他哈討情饒了自此以後該夷



將布素魯克移住該伯克住房左近看守復令多人巡查不許生人見面防守嚴密不能得手復於驅逐安集延出卡時令伊薩克面告該安集延等大皇帝以爾等安集延無端助逆擾我邊疆是以將爾等遣出永不准入卡貿易爾等倘另有巴結將中原人設法送出或將布素魯克縛獻不但有重賞且桂爾等如前貿易該頭目毛洛阿奇木說我們必有巴結以報數十年

豢養之恩旋又差五品頂翎之布魯特巴哈提拜前往探信該明巴什等明知其爲查拏布素魯克前往

並與相見據稱也不開事也不給人其意總重邀  
賞又據毛洛阿奇木私送兵丁德克金布等卽交  
巴哈提拜帶送入卡復據毛洛阿奇木云布素魯  
克看守甚嚴不能得手該處明巴什把持甚緊總  
當設法誘擒以報

大皇帝之恩等語現在仍差巴哈提拜前往諭令毛洛  
阿奇木妥辦伊薩克亦私自許以重賞復據巴哈  
提拜供該明巴什並非愛重布素魯克不過希圖  
重賞等語令伊薩克信致明巴什願出重賞以絕  
禍種刻下尙未回報至布魯特內之阿坦台族劣

克上年戕害大臣官兵亦係罪不容誅之犯

臣會

遣人持諭該二犯令其速來歸附免其一死探得  
阿坦台畏罪業已搬至托古斯托羅地方去卡甚  
遠七月間已差回子依斯拉木博巴克木薩等三  
名販羊前往令其得便下手尙未回信九月間差  
回子博巴克依斯瑪依爾誘致汰劣克該汰劣克  
於十月內遣其子托胡達邁瑪特來營遞馬據稱  
汰劣克世世受

大皇帝的恩典前年巴大人之事實是在我們該死作  
下迷天大罪如今

欽差大人免了我們的罪我教我兒子先來請安遞馬  
我未曾出花不敢進卡等語臣照常以好言撫慰  
加以賞賜遣回並諭令汰劣克速來近卡地方居  
住查該逆又是故智誑騙賞賜就便以羊換糧以  
便過冬故於其子托胡達邁瑪特出卡後潛諭令  
與汰劣克有贊之奇里克愛曼布魯特比推莫特  
中路截回細縛送來仍派令回子博巴克依斯瑪  
依爾等二名傳諭汰劣克你的兒子托胡達邁瑪  
特被推莫特搶劫現在業已要至大營爾須親身  
來取

欽差大人富有恩典大人狠惱推莫特說汰劣克業已  
投誠何得又搶劫報仇業已將其翎頂摘去現在  
差去之人尙無回信俟差人回喀情形如何再行  
具

奏  
臣受

恩深重時時以未得卡外各要犯倍深焦急奈道途遼  
遠差人往返近者月餘遠者兩三月均非刻日可  
期又兼卡外旣不動兵派令多人前往必致該犯  
等驚竄人少又不易得手現在卡外要犯未有一  
獲  
臣卽俟裝就道辜負

天恩莫此爲甚雖當設法安速辦理以復

恩命倘實在無隙可乘又不應久羈在此不了大局

臣

當與

臣

武隆阿面商方畧具細交代再具奏起程

謹

奏奉

硃批朕命卿籌辦善後諸事既妥即可回程若如此搜求卡外要犯復欲必得逆屬而後已朕恐以若所爲求若所欲雖盡心力必有後顧之憂矣覽密奏卽飭卿速還已覺另有枝節而該叅贊之光景朕實不能釋之懷也總之內地善後旣妥浩罕之茶黃旣斷卿

無事矣爲何必欲邀功生出許多情節如何了結反令朕又生西顧之憂煩懣之至

道光九年正月十二日軍機大臣字寄奉

上諭據那彥成等奏差人赴卡外籌辦各逆犯情形一摺朕命那彥成前往喀什噶爾祇爲籌辦卡內善後事宜業將八城善後諸大端籌辦周妥卽爲不負委任是以疊經賞賚前降恩旨甚明至逆裔家屬及從逆餘匪潛匿卡外原無足重輕祇可檄諭外夷各部落如能擒獻固佳否則任其偷生視息亦不過釜底游魂有何緊要在我示以寬大無意購致尙恐外夷

居爲奇貨若屢次差人赴彼暗索窮搜終不能得豈  
不爲外夷所竊笑現在善後諸事業經辦竣已另行  
飭諭武隆阿等遵旨鎮靜辦理該督接奉此旨著卽  
迅速起程來京勿再遲留

道光八年十月二十日

晉加太子太保

賞戴雙眼花翎紫韁

道光八年十二月初十日

奏爲敬陳感悚下忱叩謝

天恩事竊臣承准軍機大臣字寄道光八年十月二十



日奉

上諭直隸總督那彥成經朕派赴喀什噶爾辦理善後事宜歷次具奏籌畫諸務悉臻妥協雖未經親歷戎行其勞績實爲卓著那彥成著加恩賞加太子太保銜賞戴雙眼花翎賞用紫韁並發去雙眼花翎一枝白玉翎管一箇元狐馬褂一件碧霞壘鼻煙壺一箇黃辯珊瑚豆大荷包一對小荷包四箇交那彥成祇領以示優眷欽此當卽恭設香案望

闕叩頭祇謝

天恩伏念

臣

才識淺鮮過蒙

聖明委任卽辦回疆善後事宜未効涓埃正深慙懼前

此蒙

恩繪像

紫光閣荷非分之

殊榮實撫心而滋慙茲復渥承

恩眷

賞加太子太保銜

賞戴雙眼花翎

賞用紫韁并

賞翎管馬褂煙壺及大小荷包等件凡茲

異數之頻頒悉臣子罕逢之

曠典撫躬循省庶寐難安伏念臣籌畫一切皆稟承

硃

機先指授與兩叅贊大臣悉心措置得以稍有端倪而

此數端朕並未責成務必所以加恩者因卡內辦理周妥之故前降旨甚

卡外應辦如芟除逆屬誘擒阿坦台汰劣克等犯

明若知如此舉動卡內定歸亦無後患矣徒增愧憤之至

半載以來實難著手寸心焦灼晝夜惟勞臣節次

欽奉

諭旨切勿勞師遠出嚴索窮搜方爲得體臣服膺

聖訓斷不敢存僥倖之私致開邊釁惟有以夷制夷庶

幾一勞永逸前經遴派安人分途設法密辦業已

另摺具奏所遣之人年內必有回音如能仰賴

聖主鴻福得有弋獲俾卡外可以肅清庶微

臣少酬

高厚倘爲期尙遠自不必久駐惟有將籌辦機宜詳晰交代武隆阿如法操縱密爲布置至伊薩克渥受格外天恩數月以來實心出力而且熟悉機宜深知大體從前回子詭詐習氣頓然改易此事卽專責成伊一手辦理雖不能限以時日必有可成臣卽可先行起程回京恭覆

恩命臣渥受

重恩旣不敢稍涉因循亦不敢有心諱飾謹

奏奉

硃批覽

道光八年十二月二十八日會同喀什噶爾叅贊  
大臣武公隆阿

奏爲差人前往浩罕設法要出黑帽阿渾奈瑪特等  
四人並浩罕伯克差人請安遞伯勒克來抵喀城  
事竊查白帽愚回向來以張格爾爲其派罕巴爾  
後人羣相煽惑以致張逆入卡無不從逆旋因張  
格爾貪淫暴虐任縱安集延肆行擾害各白帽回  
衆因亦寒心極知後悔是以大兵臨蒞立卽瓦解  
查向來張逆窩住浩罕來往勾結白帽回衆多係

在喀什噶爾貿易之安集延斂錢惑衆與之來往  
通信是浩罕窩留張逆正爲勾結白帽回子起見  
至張逆盤踞喀什噶爾時黑帽回子竟多有死義  
之人是黑帽白帽兩項回子世爲讐敵內中有黑  
帽回子之大阿渾奈瑪特等彼時卽欲糾人擒拏  
張逆因張逆知覺被其拏獲並將其子布哈呢頂  
等殺害該阿渾深知大義抗不從賊張逆因將該  
阿渾送往浩罕其意以爲黑帽回衆敬奉該阿渾  
奈瑪特與白帽回衆信奉該逆無異欲令浩罕羈  
留該阿渾以繫黑帽回子之衆心張逆旋被生擒

而浩罕仍羈留該阿渾復係從前以張格爾爲餌  
收束白帽回子之故智其詭計不爲不深實屬可  
惡臣深知此事大有關係務須設法辦理以絕其  
覬覦妄念於本年六月飭知伊薩克派令向來熟  
識浩罕道路之黑帽回子阿布都薩瑪特等潛往  
探聽於八月旋回據稱該阿渾等在浩罕地方甚  
苦每月幾不能餬口而本城所有黑帽回子聞知  
此信無不嗟歎焦急當有小阿渾阿布都魯素等  
率領小回子多名同至伊薩克衙門求其面稟  
欽差大人速速設法要回我等回衆之大阿渾就是大

恩典等語臣當卽諭令伊薩克令其宣示黑帽回衆爾等各宜靜候本大臣卽當遣人辦理如果他  
不送出爲爾等回衆卽動大兵亦無不可隨差布魯特巴哈提拜同黑帽回子阿布都薩瑪特前往  
浩罕一面探訪逆裔消息一面作爲該布魯特之  
意向該處管事之明巴什阿哈呼哩等說知爾等  
容留

天朝罪人多年以致張格爾鬧事殘害生靈這是你們  
的大罪如今奈瑪特阿渾無辜又被你們留住奈  
瑪特係從前老派罕巴爾的後人和卓阿散之師



傅阿布都瓦依特的嫡派子孫你們若不送出現  
在黑帽回衆求大人們帶兵前來向你們要呢該  
明巴什等仍復狐疑意圖賞賜該阿渾有帶去回  
衆湊與該阿渾之盤川元寶十錠免人說合送與  
明巴什阿哈呼哩元寶八錠伊等惟利是圖當下  
應允現因各城安集延已被驅逐內線已斷卡倫  
甚嚴不能私自出入而屢次遣使來城均未令謁  
見不得串通消息是以因疑生畏又欲藉此求成  
希通貿易遂一同巴哈提拜並黑帽回子阿布都  
薩瑪特見該處伯克說知我等因容留張格爾得

罪

天朝如今不准通買賣我們地方眼看著窮了如今仍是恭順

天朝爲是先差人送出奈瑪特阿渾並與

欽差大人請安遞伯勒克等語該阿渾及浩罕回子薩

木占并前差去之巴哈提拜黑帽回子阿布都薩

瑪特於十二月十五日一同到喀郎圭卡倫據該

卡倫稟報本月十五日自浩罕差來之安集延薩

木占跟隨小回子三名獻馬六匹聲稱送出黑帽

阿渾奈瑪特四名帶同喀什噶爾回子三十二名

並同來布魯特巴哈提拜黑帽回子阿布都薩瑪  
特等一同到卡臣當卽派委員弁帶同通事回子  
前往查看與所稟相符於十六日押至大城令伊  
薩克先與接見問明情形據稟此次浩罕差人薩  
木占極爲恭順係該處伯克專差送奈瑪特阿渾  
就便與

欽差大人請安遞伯勒克並云如果大人賞見有面回  
的話不傳見亦不敢求見等語臣以該夷向來好  
爲大言此次差人極爲恭謹先令伊薩克派人加  
緊嚴密稽查看守於十八日傳見據稱我們因前

此七十餘年受

大皇帝的恩典於我們地方甚好如今不雅我們通買  
賣實在很苦了夏天秋天兩次差來的人不會說  
話遞阿奇木的信又說的不好所以大人們全攞  
出去了我們伯克狠愧難對我們那裏的人因爲  
我從前在這裏當胡達依答曾在這裏伺候過大  
人知道規矩能說話叫我來給大人請安遞駝絨  
四疋花布八疋塔兒糖松子葡萄等物大人吩咐  
甚麼話都叫我應允我們回子例上沒有的話我  
們伯克不敢應承總求大人施恩准我們照從前

一樣作買賣等語臣當卽諭以你們伯克知道害怕愧悔差你來所稟的都狠知道道理這是你們那裏的造化但只你們伯克容留

天朝叛逆之子並兵民回子至今不肯全行送出任你說話十分恭順斷不能通買賣你說的回子例上沒有的話不過是逆裔的事我的說話多了你不記得與你一說帖上面都寫著好好記了面回你們伯克並回賞綢緞茶葉等物於三十日卽令伊什罕伯克托胡達呢襍爾押帶出卡查浩罕貪利詭譎經

聖明指示永遠不准通商

臣

等欽遵辦理驅逐安集延

嚴緊卡倫未及一年狐疑生畏而從前虛驕之氣不敢復萌此次差來之人雖未卽將逆裔送出其情辭已極恭順

廟謨宏遠

臣

等曷勝欽佩欽服至黑帽回子大阿渾奈瑪

特

臣

等以該阿渾之子布哈呢頂等捐軀盡節已

奏蒙

聖恩賞加該阿渾之子孫邁買底敏等世襲翎頂在案茲奈瑪特等於十六日進卡其時闔城黑帽回衆不下三四千人扶老攜幼遙瞻頂禮於十九日傳

見諭以爾等係念經行善的人素爲回衆信服爾  
能不甘從逆甚屬可嘉你之子弟業蒙

大皇帝天恩給予翎頂世代承襲何等榮耀爾等受  
恩旣重當好爲隨時開導愚回勉爲善良況且黑帽回  
子多有出力之人是

大皇帝的好奴才大人們當格外憐恤爾等阿渾尤當  
加意教化全在爾等阿渾尋常用心該阿渾奈瑪  
特阿布都爾蘇魯庫布頂玉素普等四人向來從  
無免冠磕頭之禮經<sub>臣</sub>當下給予奈瑪特三品翎  
頂並厚加賞賜元寶綢緞茶葉等物登時露頂伏

地叩謝流涕聲稱我們如今重見天日都是

大皇帝的恩典敢不謹遵大人的教訓好好盡心教化

各回子與

國家出力

臣

復加以慰撫諭令各散而各黑帽回衆

俱至

臣

公館叩謝當卽出示曉諭各回衆無不歡

欣鼓舞感沐

皇仁所有諭浩罕伯克說帖及曉諭回衆告示另繕清

單恭呈

御覽查此次浩罕送來之阿渾奈瑪特係黑帽回子之

頭目第一大阿渾各城大臣及阿奇木之於回衆



原不能隨時親身開導教諭回衆全在阿渾今與以傳見並推廣

皇仁給予劄頂各黑帽回衆求見叩謝歡聲載道至有感泣之人自此人心可期愈固卡外少一繫心之事臣等又恐白帽愚回復生疑懼仍一面傳至白帽阿渾雅浩卜等數名諭以爾等自分黑帽白帽在

大皇帝大公至正一視同仁不論黑帽白帽均係

大皇帝的奴才但知安分並無分別總之有功必賞有罪必罰爾等白帽中以張格爾爲大阿渾該逆逆

天背理爾等深知且此次擾害回家無惡不作爾等又係身受目覩

大皇帝深知爾等委曲更加

垂憐爾等各阿渾惟當深思報答

大皇帝天高地厚的恩典勸化回衆俱作善良該阿渾等稟稱現在各自帽回子深恨張格爾去年張格爾被擒時連我們的女人孩子都唾罵他的如今請大人放心托

大皇帝的洪福我們回疆永遠太平了

大皇帝看我們都是一樣我們斷不敢自分黑白致滋

事端等語<sub>臣</sub>等亦酌賞羊麵綢緞等物以安其心  
復據奈瑪特阿渾稟稱張逆之子從前看守甚嚴  
近來也鬆下來了該處伯克無知不管事全仗明  
巴什阿哈呼哩一人明巴什也狠害怕不過說大  
話欺人但不通買賣就在明巴什身上總可得手  
只是不能限定日期等語又據前遣去之布魯特  
巴哈提拜面稟稱我到浩罕將阿奇木伊薩克給  
毛洛阿奇木的信都給了毛洛阿奇木說你先同  
薩木占去我隨後差人送中原人出來並有該處  
管事的和卓答他哈也差人來俱有給阿奇木的

密信我們這裏如何辦法我的人到了就知道了  
叫我先回大人們知道他怎麼辦法未對我說等  
語臣等詳細揣度逆裔布素魯克在該處原無關  
重輕該夷故作疑難無非居奇圖利之心前經節  
次遣人密辦今據奈瑪特等所稟仰仗

皇上天威可期弋獲惟耽延時日使臣戀

闕之情彌增焦急臣受

恩深重但能於事有濟就使多延數月辦理肅清實臣

仰酬

高厚之至願祇恨智識淺薄不能即時得手惟有俟毛

洛阿奇木差來之人到來能否轉稟再當據實具奏謹

奏

諭浩罕伯克說帖

諭安集延回子薩木占你們浩罕伯克容留

天朝罪人從前念爾等歷年恭順本大臣尙未深信自  
張格爾滋事以後張格爾之子布素魯克現在  
你們地方而且張格爾裏脅之人及擄掠的東  
西都送了你們你們容留

天朝反叛的後人是真的了如今你們的伯克深知後

悔差你來請安遞伯勒克我狠喜歡我也回賞  
你們伯克的東西你回去說問你伯克好你們  
外夷小愛曼的見識不過說回子的規矩不能  
送出布素魯克我這裡原沒有必定這時候要  
布素魯克你們伯克真心恭順將布素魯克並  
張格爾攔去人都送出來

大皇帝喜歡不知有何等重恩准你們照舊通買賣你  
們合愛曼從此就過太平日子你們不送來想  
通買賣是不能的告知你們的伯克及你們辦  
事的人從長商議一月內差人來此送信

曉諭回衆告示

爲通行曉諭回衆事照得本大臣恭承

恩命辦理善後事宜念爾黑帽阿渾奈瑪特等因不敢  
降張格爾將其子布哈呢頂等殺害並將奈瑪特  
送往浩罕該阿渾爲爾等黑帽回子素來敬服之  
人遠在外夷使爾等各懷繫念夏間經爾等回衆  
懇求阿奇木伊薩克稟稱該阿渾奈瑪特不從張  
逆忠節可嘉求設法向浩罕要出方足以慰黑帽  
回衆之心等語本大臣當卽密差布魯特巴哈提  
拜等前往浩罕設法密辦現於本月內浩罕伯克

差令薩木占來遞伯勒克請安送出該阿渾等四  
人本大臣鑒其恭順業已加賞遣回因思爾等黑  
帽白帽雖係自分種類在

天朝大皇帝天恩所被一視同仁黑帽中有盡忠立功  
者如奈瑪特阿渾等悉予賞賜並給予翎頂虛銜  
如從前滋事之孜牙墩亦係黑帽回子立時剿滅  
白帽中如素皮呢斯等皆係盡忠報

國之人其子嗣邁瑪玉蘇普阿布都爾錫等俱賞給  
世襲翎頂其有從逆之人業已殲除

天朝大皇帝恩如天地明如日月至正大公善良者陞



賞之外子孫俱受

恩榮匪類者立即殲滅是無論黑帽白帽俱係

大皇帝的奴才並無分別偏向爾各回衆當思勉作善  
良子子孫報効

重恩至爾等回衆向來念經禮拜遇有疑難諸事無不  
聽阿渾之言是阿渾等雖無官職俱有教化之責  
且大人及阿奇木公事繁多不能隨時隨事親身  
教諭惟在阿渾等持心公正事事總思對

天時時教導衆回勉存好心於公於私均有裨益嗣後  
無論黑帽白帽阿渾本城者應令每逢朔望到衆

贊衙門請安遠莊者或一月或兩月來大城與叅  
贊請安日久與大人官員阿奇木伊什罕熟識回  
子等大小事均可面稟於公事大有裨益如此明  
定章程責成阿渾等盡心教諭各回衆永無犯法  
爲匪之人

上天必多賜爾等福壽子孫衆多於回衆永遠有益合  
行出示曉諭爲此示仰各該阿渾等知悉各宜凜  
遵勿忽特諭

道光九年二月初一日軍機大臣字寄奉

上諭據那彥成等奏差人前往浩罕設法要出黑帽阿

渾奈瑪特等四人並浩罕伯克差人請安遞伯勒克等情朕命那彥成前赴喀什噶爾籌辦善後事宜並未責成伊於卡外搜捕要犯及逆裔家屬乃那彥成有意邀功屢次遣人赴卡外刻意搜求殊大負委任之意本日復據奏報設法要出黑帽阿渾奈瑪特等四人給與翎頂及賞給元寶綢緞茶葉等物并有諭浩罕伯克說帖欲其將逆屬弋獲送出斷絕根株如此布置殊可不必現在善後奏定章程業已周妥該大臣等務當遵照前旨嚴密稽查勿任大黃茶葉偷漏出卡亦不得仍令該夷隱混貿易卽爲妥善至於

卡外各犯既已畏罪遠竄總當置之不問斷不可意  
存招致妄生邊衅如辦理稍有不善或致大黃茶葉  
仍有偷漏惟伊等三人是問恐不能當此重咎也

道光九年二月初五日會同喀什噶爾叅贊大臣  
武公隆阿

奏爲遵

旨覆奏浩罕實在情形據實具奏事竊臣等於本年正  
月二十八日接准道光八年十二月二十八日軍  
機大臣字寄奉

上諭那彥成等奏招致附從浩罕之額提格訥布魯特

部落指與特依劣克達坂地方妥爲安置等語覽奏  
嘉悅之至額提格訥前此爲浩罕所脅強佔其地現  
因苦於悉索遵檄率其部衆前來投誠俾浩罕頓失  
羽翼固屬甚善然受降易撫降難在該部落現與浩  
罕爲讐敵或不致有虛假惟伊歸附浩罕有年一旦  
遵我檄諭前來未必浩罕不以我納彼叛人爲詞設  
以此遣使致問豈不又生邊衅且特依劣克達坂地  
方旣在卡外該布魯特等自往往牧則可亦未便卽  
爲天朝指與地方令其安置該督等當體察情形妥  
爲辦理慎勿視爲易易凡撫馭之方或通商等事尤

期經久無弊該部落向爲浩罕羽翼今復徙居他所  
豈肯棄若敝屣設有蠻觸相爭之事該布魯特等必  
當求援不應則失信外夷應之則無此政體亦當預  
爲議及該督等當諭以爾部落旣誠心歸命大皇帝  
嘉爾効順將該比阿里瑪卡加恩賞換二品頂戴與  
効順各布魯特愛曼一視同仁善爲撫卹爾等當自  
安生計永作藩籬惟與外夷有構怨興兵之事天朝  
體制從不過問不但爾部落一處爲然並非稍有歧  
視如此預爲曉諭庶將來有求不應不致稍生缺望  
也欽此仰見我

皇上聖慮周詳洞明萬里凡

機先之指授皆扼要之邊防

臣

等愚蒙時懷凜懼經

聖明開示得所遵循曷勝欽感欽服之至查卡外各夷  
經上年大兵懲創後如布噶爾巴達克山達爾瓦  
斯等強盛部落暨各布魯特愛曼先後來歸情詞  
恭順節經詳細

奏明在案惟浩罕因其上年助逆現在容留逆裔及  
逃亡賊犯被脅之官兵回子等並未全數送出且  
歷年來雖通市互易又不能如別部之恭順是以  
欽遵節次所奉

諭旨斷不與之通商自閉關以來該夷已遣人到城數

次臣惟有堅持定見遵

旨辦理至該夷實在情形臣等從前亦不過得自傳聞

自去年至今時加訪問並陸續送出之兵民回子  
阿渾等均具細備訊取供據稱向來傳說浩罕地  
方富強所屬八城今該兵回等親歷其地據稱該  
夷之所謂八城不過八大回莊並無城池該處八  
城共養兵一千餘名號稱三千其西界烏勒特派  
南界達爾瓦斯喀拉提錦北界哈薩克東界卡外  
各布魯特游牧其地南北七百餘里東西六百餘



里其間空濶處尙有戈壁每年歲賦多則六七萬而號稱十三四萬本不足用惟藉買賣抽稅強取豪佔尙可敷衍近因不准通商用度益爲不足只可加倍刻削所屬人戶其屬下無不人人愁怨又聞卡內回子陋規裁禁賦役更輕莫不延頸向慕視爲樂土而西界浩罕之烏勒特派是其讐敵每年總有兩三次打仗近日布噶爾已准在葉爾羌通商又以其剋扣其金錢彼此亦成罅隙哈薩克亦常常搶奪達爾瓦斯喀拉提錦日日在旁虎視前摺業將情形具奏今達爾瓦斯喀拉提錦先後

歸命

天朝哈薩克游牧久著恭順各布魯特愛曼悉受羈縻  
該夷以彈丸黑子之區界居

天朝屏翰之中衰敗孤立救亡之不暇萬不能妄生他  
念已可概見更兼從前浩罕所恃以勾結卡內之  
白帽回子者以張逆爲餌上年張逆滋事縱放安  
集延等大肆荼毒回衆已爲寒心況仰仗

天威逆酋授首該夷益無所施其伎倆目下所居奇者  
不過逆裔家屬臣等亦惟遵

旨處以安靜不必一定勒令縛獻然張逆之子布素魯

克雖未成丁將來日久難保不又滋生事端臣等  
惟當盡心竭力設法辦理以清後患但恨智識短  
淺不能卽時得手仰副

恩命時深焦急至浩罕以叢爾之地據兵民回子各供  
年年與烏勒特派打仗所號稱兵者不過三千人  
每遇出兵時在各莊湊集多人驅之使戰人馬全  
係自備口糧不過十日裹帶往往以糧盡而散前  
據德克金布等供均屬相符並聞上年張逆圍困  
喀什噶爾時張逆邀其進卡該夷聞救兵未到帶  
領四五千入於七月二十二日幫助張逆攻城張

逆原騙該夷稱言官兵鎗箭無用不能傷人及至  
接仗被官兵憑城打退殺死八百餘人帶傷者不  
計其數而自離巢穴鄰界旋即攻劫在途次又因  
口糧罄盡其手下之人俱各棄其伯克散歸是該  
夷業已喪膽斷不能輕離巢穴情勢確然且該夷  
人今俱納款歸順如果輕離巢穴各夷人均可乘  
空攻佔至現在投出之額提格訥布魯特愛曼從  
前原係我之臣屬被浩罕裏脅茲因浩罕苦累慕  
義來歸本係該夷擄脅

天朝所屬之部落茲之來歸並非該夷之亡命前此額

提格訥來時卽與該夷打仗將其殺敗其力卽不能相敵<sub>臣</sub>等前奏所指與特依劣克達坂游牧地方距卡八日路程約有千里原係該愛曼舊時游牧茲已住定三月有餘<sub>臣</sub>等曾派人順便密加訪查實爲安靜茲奉

諭旨賞該比阿里瑪卡二品翎頂該比自益知仰沐天恩倍深感激復查各愛曼布魯特之與浩罕本非同類又無統屬強則相並弱則相離今額提格訥雖全部來歸仍處以卡外地方其夷人與夷人縱有讐殺之事向俱不相告稟今惟當遵

旨嚴守卡倫聽其自爲該夷貪利無恥現在不准通商  
亦必鼠竊狗偷私自賄囑附近各布魯特代爲湣  
迹銷貨臣等於嚴飭各卡倫加緊稽查外一面飭  
知各布魯特如有該夷販貨之人卽時稟報卽將  
私販之貨全行賞給此外尙有重賞倘敢扶同湣  
迹必當重治其罪使其互相疑貳亦屬有益蒙  
諭令臣等擬議撫綏暨交易章程容臣等悉心妥議再  
行奏

聞臣受

恩深重仰蒙

豢養多年於尋常事件猶不敢易視況邊疆關係匪輕  
敢不愼而又愼前摺內未能聲敘詳明致勞

聖慮捫心自問悚仄益深然<sub>臣</sub>等節次所奏布魯特及  
浩罕各情形均係研究各兵民回子所供加以互  
証實不敢一言虛飾尤不敢存徼倖邊功之心致  
悞大局厯查浩罕實在情形如此堪以仰抒

聖廑謹

奏

道光九年二月初五日

奏<sub>臣</sub>從前在喀什噶爾叅贊任內彼時阿奇木伯克

係伊斯罕達爾

臣

初到時據伊斯罕達爾所稟浩

罕情形盛稱其人民強富與

臣

向來所聞光景相

符旋因浩罕遣使來城

臣

密令委員詳加盤查訪

問的確復向伊斯罕達爾究詰該前任阿奇木始

據實稟稱自乾隆年間歷任阿奇木往往爲浩罕

粧點恫嚇大人們總爲該夷貿易入卡向阿奇木

說通藉圖免稅大人們爲阿奇木所動任聽免稅

阿奇木及以下伯克就中取利其實浩罕不過八

大回莊一切兵刑錢穀等事漫無紀律斷不能爲

我邊患等語

臣

此次到喀什噶爾以後實不敢謬



執前見輕視浩罕曾向伊薩克面訊據伊薩克所稟情形與伊斯罕達爾所言相同並稱從前浩罕伯克愛哩木在時辦事尙屬明白尙知賞格布魯特如今浩罕伯克邁瑪達哩頑劣無知難信明巴什一人管事苦累附屬之布魯特以致各布魯特於彼攜貳大者情願來歸小者亦各走散等語臣復將屢次從浩罕投回之兵民回子等逐細研詰所供情形不過大同小異查歷任大臣中不深知情形往往爲阿奇木朦蔽以致浩罕之勢轉張又有明知實在情形不肯據實直陳希圖將來討好

見長地步此俱係向來實在下情如此臣身受

重恩曷敢將緊要邊務少有輕忽致勞

聖心第

臣

在此將及一年隨時訪察情形實不敢一字

虛假致蹈欺飾之名

臣

節次所奏浩罕削弱不振

俱係實在情形謹

奏奉

硃批所奏明晰知道了

道光九年二月初五日會同喀什噶爾叅贊大臣

武公隆阿

奏爲浩罕投回回子漢民訊取供情據實具奏謹

據守卡營員稟報者浩罕投回喀什噶爾回子木  
薩阿布拉漢民喬起勤劉秉和劉秉祥派兵押送  
到城當交伊薩克提訊浩罕情形據木薩供奴才  
是喀什噶爾回子向在浩罕做買賣我哥哥塔迪  
里克隨張格爾得過六品伯克大兵到來隨同張  
格爾逃往浩罕上年接奉

欽差大人諭帖免了他的罪卽欲投回我哥哥又奉王  
阿奇木的諭令設法擒獻布素魯克出力贖罪先  
前浩罕明巴什罕定主意將布素魯克收在浩罕  
附近地方嚴密看守不許人見近日浩罕伯克派

了各莊子的人要往烏勒特派打仗沒人看管已將布素魯克交給張格爾的丈人在喀訥克斯莊子上居住離浩罕六七十里路有喀什噶爾回子阿布都拉是張格爾心腹在彼照管我哥哥與阿布都拉狼相好就拏了茶葉食物前去探望布素魯克母子見面不避連去數次奴才也跟去過見布素魯克今年八歲是微紅圓臉尙未出花阿布都拉時常帶他在外頑要我哥哥探聽阿布都拉口氣他也想回家若乘此時浩罕伯克出外打仗勾通阿布都拉許以重賞他亦暗地裏托

大皇帝的洪福能設辦妥我們都好贖罪了因要躡一條僻徑道路以便將來行走迅速就置辦幾種貨物只說進卡求通貿易找了路徑最熟的布魯特張哈拉什帶路前來叫我與大人們請安面稟我哥哥報効真情求將我的貨物交王阿哥木封貯限我兩箇月或我回去就能到手三四十天也不定現在浩罕的滿漢兵丁漢民我哥哥都要設法送他們出來已查明人數另稟開呈此次帶出來的三箇漢民裔起勤等與哥哥同在安集延莊上居住與他們相好抱經起過誓我哥哥要辦布素

魯克的主意也與他們密商量過他們狠勸我哥  
哥辦了這件事不但可以免罪還可得好處是以  
先帶他們三人出來只求訊問他三人便知實情  
等語據阿布拉供亦相同臣等當即親提漢民喬  
起勤劉秉和劉秉祥隔別研訊該民人均係被難  
逃往浩罕並無從逆被脅情事據供布素魯克現  
在伊外祖家居住不似從前防範嚴密塔迪里克  
人甚老練其心存擒獻布素魯克希圖免罪邀功  
令伊弟木薩假作貿易躡路進卡稟報名情形與  
木薩供詞均相照合臣等請以從前浩罕看守布

素魯克甚嚴何以現在不管了據稱這兩年斷絕貿易浩罕狠下不去囤積貨物甚多買賣人都抱怨明巴什茶葉貴了數倍年年與烏勒特派打仗他們並沒兵都在各莊子湊人自備糧草出兵糧盡人也散了傷損人馬不少近因不通買賣越沒錢越苛派屬下衆人都抱怨他的伯克聽得布噶爾又與他結了讐也要來打仗他管的布魯特又都各自逃散了所以明巴什也沒主意將布素魯克交與他的外祖收管若要他們送出來那是不能的塔迪里克的辦法據小的們看來却有七八

分拏手那阿布都拉是張格爾的心腹他家再不  
疑惑他的塔迪里克還有一箇兄弟愛薩也能辦  
事在這幾箇人身上總可成功小的們是好百姓  
不敢扶同說謊等語臣等體察情形塔迪里克係  
從逆之人或希圖免罪儘可遵諭投回何必爲此  
虛假之詞設不應手轉自絕其投回之路況其家  
屬貨物全在喀城情理似無虛詐質之漢民喬起  
勤等又堅稱塔迪里克密辦此事確有幾分拏手  
詢之伊薩克亦稱上年買囑安集延密辦此事經  
塔迪里克聞知曾說安集延與張格爾家屬如何



得能見面內地既要辦此事何以大人們不靠著  
我呢伊薩克聞知此語卽發給諭帖令其報効此  
人極能辦事等語譯出塔迪里克遞伊薩克稟  
內查明浩罕現在滿漢兵丁民人遣犯數日甚爲  
懂事以其立功贖罪之心尙屬可信復提木薩阿  
布拉面訊無異諭以塔迪里克如此用心報効殊  
堪嘉獎爾等速卽回去令其上緊趕辦如能於四  
十日內將布素魯克生擒縛送必當奏懇

大皇帝天恩

賞給塔迪里克二品頂翎補授三品伯克阿布都拉愛

薩及爾等二人請

賞三品頂翎補授四品伯克仍各賞元寶一百箇給予  
印諭令其馳回該回子所帶貨物均情願留交伊  
薩克封貯木薩等卽於二月初一日出卡臣等悉  
心揣度浩罕泥於回子經典必不肯將和卓後人  
縛獻茲因不通貿易生計艱難又與鄰近部落互  
相殘賊諸事掣肘明巴什今將布素魯克交與伊  
外祖收管其居奇之意已懈如能仰邀

聖主福庇乘此機會弋獲實可永除邊患但端倪甫見  
固未敢信其事在必成而羣言確鑿亦未便視為

無稽惟有靜待事機約計三月望間卽可得其能  
否辦理准信臣那彥成不得不暫緩起程藉可將  
卡內外一切事宜復加斟酌以期詳盡無遺列款  
交代倘至期尙有延挨臣那彥成卽行束裝回京  
恭復

恩命將辦理機宜與臣武隆阿當面議明交代並將漢  
民釋令回籍並譯繕原稟抄錄喬起勤等供詞恭  
呈

御覽謹

奏

道光九年三月初六日軍機大臣字寄奉

上諭那彥成等奏查明浩罕削弱情形並投出回子漢民據供辦理逆裔家屬各一摺浩罕以蕞爾之區近復翦其羽翼日就削弱不致爲我邊患固屬甚善然當處以鎮靜聽其自斃斷不可喜事邀功別滋衅端惟該夷貪利無恥現因嚴立章程不准通市未必不賄囑附近各布魯特影射貿易該大臣等惟當嚴飭各卡倫及經理貿易之官弁伯克等嚴密稽查勿致墮其術中轉爲羣夷所竊笑至所奏飭知各布魯特如有該夷販貨之人及時稟報卽將私販貨物全行

賞給此外尙有重賞一節行之恐有流弊若布魯特貪圖重賞輒將他夷貨物指爲浩罕私販豈不又生邊衅尙當悉心妥酌務期嚴絕偷漏不致日久滋弊方爲至善現據投回漢民回子供稱從逆回子塔迪里克能將張逆之子布素魯克設法縛獻若能如此辦理自可贖其前罪倘不能如其所言亦不必刻意求獲卽謂可以永除孽萌也將此由四百里諭知那彥成並諭札隆阿額爾古倫伊薩克知之

道光九年二月初五日

奏爲恭謝

天恩事竊

臣

承准軍機大臣咨寄年前

恩賞福字荷包銀鏤銀錢食物又

加賞

臣

壽字一幅並蒙

恩賞

臣

子容照荷包銀鏤食物由驛賫送到喀當卽恭

設香案率同

臣

子容照望

闕叩頭祇謝

天恩伏念

臣

奉

命回疆涓埃未報疊荷

聖恩優渥

賚予駢蕃五中感激惶悚難安茲以歲會之更

恩膏之逮

普膺多福用敷錫於薄海臣民遠賁

殊恩乃遍被於一家父子

天章輝雲漢之光

寶翰煥絲綸之彩佩囊誌

寵同叨

內府之藏金承筐是將共飫

天廚之珍果

聖恩稠疊悚感難名

臣

惟有益勵愚誠將回疆

切事

宜斟酌萬安列款交代俾仰托

聖主鴻福長治久安邊陲咸登

壽域以期仰答

高厚恩慈於萬一謹

奏奉

硃批知道了

那文毅公籌畫回疆善後事宜奏議卷七十九